

የሁዳይ ጸፊዳ ኪታ ጊደ ቆፋ

የሁዳ ኪታይ ጸፊቲዳይ አማኒዛይታሰ ጊደንታ አማኒዛ አሰ ሚሳቲዲ ዋርዶ ቲሚርቲ ቢታ ጋሊዛ አሳታፔ አማኒዛይቲ ናጌታና ማላሳ። ናምኣንሉ ጴጽሮሳ ኪታ ሚሳቲዛ ሃይሳ ሃ ቃንሳ ኪታዛን ጸፊዚ፡ «ጸሳይ ናምኣንሉንታ ማላ ባ ዳሬዛሰ ኢሲቶ ኢሚዳ አማኖ ጊሻሰ አሳይ ሚኒ ኦሌታና ማላ» ናባቢዛይታ ሎኤሊ ቆፍሴሰ።

ሃ ማጸፋይ ኦይኪዳ ኩሜሳ ቆፋ

ጌሎሶ 1-2

ዋርዶ አሰታማሬታ ቲሚርቲ፡ ሃኖኔ ኩንዴሰ 3-16

አማኒዛይቲ ባ አማኖ ናጋና ማላ ኢሜቲዳ ዞሬ 17-23

ዉርሴሳ አንጆ 24-25

¹ ዬሱስ ኪርሰቶሳሰ ኦሊዛ ያቆቤ አሻ የሁዳ፤ ኢንቴሰ ጴይጌቲዳይታሰ፡ ጸሳይ አዋይ ሲቁዛይታሰኔ ዬሱስ ኪርሰቶሲ ናጊዳይታሰ ኡባታሰ፡

² ማሮቲሊ፡ ሳሮቲሊኔ ሲቆይ ኢንቴሰ ዳሮ።

ዋርዶ አሰታማሬታ

³ ታ ሲቆቶ! ኑ ኢሲፌ ኣቲዳ አቶቲሳ ጊሻሰ ታ ኢንቴሰ ጸፋናሰ ዳሮ ኮያዲሲሺን ሃኢ ቃሴ ናምኣንሉንታ ኢሲቶ ጸሲ ኣሳሰ ኢሚዳ አማኖ ጊሻሰ ኢንቴ ዳሮ ባጴታና ማላ ታ ኢንቴና ዞሬይሰ። ታ ኢንቴሰ ጸፋናሰ ታሰ ቶሆ ጊዲዴሰ።

⁴ ኢሰታ ቦላ ፒርዴታናይሲ ዳሮ ዋጾፔ ካሴ ኢሰታ ጊሻሰ ጸፊቲዳ አሳቲ ኢንቴኮ ካልጰ ጌሊዳ፤ ሄይታንቲ ጸሰ ኤሮንታይታ፤ ኑ ጎዳ ኪያቲሳ ጮ ሜላ ላሚዛይታኔ ጸሳ ጎይኖንታይታ። ኢዚ ባርካ ኑና ሃሪዛይሳኔ ኑሰ ጎዳ ጊዲዳ ዬሱስ ኪርሰቶሳካ ካዴቲሰ።

⁵ ኢንቴ ሄሳ ኡባካ ካሴቲ ኤሪኮካ ጎዳይ ባ ዳሬዛ ጊብጾፔ ኬሲዲ አሺዳይሳኔ ሃንኮ አማኖንታይታ ጉዬፔ ጳይሲዳይሳ ታ ኢንቴና ኣኬኪሳና ኮያይሰ።

6 ሄሳቶካ ባ ቦንቾ ናጎንታ ኢጲዲ ባ ዲዛሶ ዬዲዳ ኪታንቻታ ኢንቴ ዩሺ ቆፒቴ፤ ጸሲ ኢስታ ጌታ ፒርዳ ጋላስ ጋካናስ ሜርና ቃሾስ ጌርዲ ጌዳ ጵማን ናጌ ዋሊዳስ።

7 ሄሳቶካ ሶዶሜይኔ ጋሞራይ ቃሴካ ኢስታ ሄራን ዲዛ ካታማቲካ ላይማቲዳኔ ሳሎ ሜጴቴላታራ ላይማታናስ አሞቲዳ፤ ሄሳ ጌሻስ ኢስቲ ሜርና ታማን ጸጌታናይታስ ለሚሶ ጌዲዳ። *

8 ሄሳቶካ ሄ አሳቲ ባርካ ባ አጉሞ ካሊዲ ባርካ ባ አሾ ቱኒሴቴስ፤ ባፔ ቦላራ ዲዛይታስ አዛዜቴቴና፤ ኢስቲ ሳሎን ቦንቾራ ዲዛይታካ ጫዬቴስ።

9 ሃራይ አቶሺን ሳሎ ኪታንቻታ ሃላቃይ ሚካሌይ ሙሴ አሾ ጌሻስ ኢዛራ ፓላማቲሼ፤ «ኔና ጎዳይ ሃንቄቶ!» ጌዴስ አቲን ኢዛስ ጫሻ ቃላ ዛሪቤና።

10 ሃይቲ አሳቲ ጌዲኮ ኢስታስ ኤፊቶንታ ኢጲዳ ሚሽ ኡባ ጫሽ ጫዬቴስ፤ አይኮካ ኤርንታ ማሃታ ማላ ጮ ማላ ቆፒ ኤኪዳ ሚሺ ኢስታስ ዲኮ ኢስቲ ሄሳን ጳያና።

11 ኢስቲ ቃዬሌ ኦፔን ቢዳ ጌሻስ ሚሻስ ጌዲ ባላአሜ ማላ ባላን ኩንዲዳ፤ ቃሴ ቆሬይ ኤቄቲዳ ማላ ኢስቲካ ኤቄቲዲ ጳይዳ ጌሻስ ኢስታስ አዬ አና!

12 ሃይቲ ሃ አሳቲ ዬላይ ባይንዳ ላይማ ሃራ ኢሲ ቦላ ኢንቴ ዲጊሳሶን ቤቲዛ ዋዴ ኢንቴስ ጵጵ ጌዴቴስ፤ ኢስቲ ባስ ጸላ ቆፔቴስ፤ ኢስቲ ጫርኮን ቢዛ ኢራይ ባይንዳ ሻራ ማላ፤ አይፌይ አይፊዛ ዋዴን አይፌይ ባይንዳ ጸጸፔ ቅቃሌቲዲ ናሞኡቶ ማሊዳ ሚላ ማላ።

13 ኢስቲ ዬላቺዛ ባ ኦሶዛ ዋልቃማ አባ ዳሞባላ ማላ ጎፖንቶ ጮፑ ሂስቲዛይታ፤ ጌርዲ ጌዳ ጵማይ ኢስታ ሜርናስ ናጌዛይሳኔ ጮ ማላ ዋዬቲዛ ጸለንቲታ ማላኮ!

14 አዳሜፔ ሃ ሲሚን ላፑንሶ ዬሌታ ጌዲዳ ሄኖኬይ፤ «ሄኮ ጸሲ ቆዳይ ባይንዳ ጌሻ ኪታንቻታራ አሳ ኡባ ቦላ ፒርዳናስ ያና።

15 ሄይቲ ጸሳስ ጎይኖንታ አሳቲ ኦሊዳ ኢታ ኦሶ ጋሶን ኢስታ ኢዚ ቃጸያና፤ አዳፊካ ጸሲ ሄይታ ባስ ጎይኖንታ ናጋራንቻታ ቦላ ኢስቲ ሃሳይዳ ኢታ ሚሻታ ጌሻስ ኢዚ ኢስታ ቦላ ፒርዳና» ጌዴስ።

* 1:7 ሶዶሜ አሳይ ሎጸኮ ዬዳ ኢማላታራ ላይማታና ኮዬዳይሳ ቤሴስ። 1:7 ሜጴ 19:1-24 1:9 ዳኔ 10:13፤21፤ 12:1፤ አጁ 12:7፤ ዛሬ 34:6፤ ዛካ 3:2 1:11 ሜጴ 4:3-8፤ ታይ 22:1-35፤ 16:1-35 1:14 ሜጴ 5:18፤21-24

16 ሄይቲ ሄ አሳቲ ኡባ ዎዴ ዙዙሚቲዛይታኔ አይ ሚሻንካ ኡፋዬቲ ኤሮንታይታ፤ ኢስቲ ባ ኢታ አሞ ካሊዛይታ፤ ኢስታ ዶናን ኦቶሬቴፋ ቃላይ ኩሚዴስ፤ ባስ ባ ጎኣ ኮዪሼ አስ አዳሼቴስ።

እኬኪሶ ዞሬ

17 እንቴኖ ታ ሲቆቶ! ኑ ጎዳ ዬሱስ ኪርስቶስ ሃዋሬቲ ሃይሳፌ ካሴ ዮቲዳ ቃላ እኬኪቴ።

18 ኢስቲ፥ «ዎዴ ወርሴፋን ጸሳ ሼኔፔ ሃኪዳይቲ ባርካ ባ ኢታ አሞ ካሊሼ አስ ቁጂዛይቲ ያና» ጌዲ እንቴስ ካሴ ዮቲ ዎሊዳ።

19 ሄይቲ አስ ኢሳ ኢሳፌ ሻኪዛይታ፤ አሾ አሞቴላ ካሊዛይታኔ ኢስታን ጲሎ አያናይ ባይንዳይታ።

20 ታ ኢሻቶ! እንቴ ጌዲኮ ኡባፌ ቦላራ ኢንቴ ጌሻ አማኖን ሚኒ ኤቂቴ፤ ጲሎ አያናንካ ሚኒ ዎሲቴ።

21 ኑ ጎዳ ዬሱስ ኪርስቶሲ ባ ማሮቴፋን እንቴና ሜርና ዴኦን ጋፋናይሳ ናጌቲሼ እንቴናቴፋ ጸሳ ሲቆን ናጌቴ።

22 ሲዲሼ ዲዛ አሳታስ ሚሼቴቴ።

23 ኢሲ ኢሲ አሳታ ታማፔ ኬሲ ኤኪ አሺቴ፤ ሃራታስ ያሻቴፋን ሚሼቴቴ ሺን ናጋራን ቱኒዳ ኢስታ አሳቴላ ቦቺዳ ማይኦካ ኡባ ኢጲቴ።

ጋላታ ዎሳ

24 እንቴና ኩንዳፌ አሻናሲኔ እንቴና ዎሶይ ባይንዳይታ ሂስቲዲ ኡፋይሳን ባ ቦንቾ ሲንላ ሺሻናስ ዳንዳይዛይሳስ፤

25 ኢዚ ጸላ ኑስ ጸሳኔ ዳሌ ጌዲዳ ጎዳ ዬሱስ ኪርስቶስ ባጋራ ቤኒፔ ዶሚዲ ሃኢ ጋካናሲኔ ሜርናሰካ ቦንቾይኔ ጌታቴሊ፥ ዎልቃይኔ ጎዳቴሊ ኢዛስ ጌዶ። አሚን።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b